

Confeugo 2018

Sciô Scindico,

no pòsso comensâ o mæ discorso e i mæ mogogni senza aregordâ a grande tragedia de st'agosto chi: o cròllo do ponte Morandi ch'o l'â provocòu 43 vittime e graviscimi danni a chi stava la de caza e a chi la gh'aveiva e seu atività. Chi me pâ inportante menzonâ quello che sciâ l'â dito vosciâ subito dòppo o cròllo: «Zena a no l'é in zenoggio: a reacion da çitâ a l'é stæta grande» e quello ch'o l'â dito o Cardinâ Bagnasco: «Zena a l'é stæta feria, ma no cegâ». Son queste e paròlle che dan önô a tutti quelli che se son dæti da fâ fin'oua e se daiàn da fâ pe serâ definitivamènte sto dolorozo capitolo da grande stöia da nòstra çitâ.

Vegnimmo a-i mogogni. L'ò dito doe vòtte a-o scindico Döia (do 2013 e do 2016) e òua o diggo anche a vosciâ: Zena a l'é 'na çitâ sucida! Gh'é rumenta da tutte e parte, anche inte nòstre stradde ciù belle. Tanti menissi de papê, plastica, botigette, tòcchi de veddro, lamme de bira e tante atre cöse che basta amiâ 'na stradda quæ se sæ pe vedile. Saiâ che e gente son mâducæ, saiâ che chi vive de neutte o pensa solo a inbriægâse, saiâ che no gh'é in cian eficente pe polî e stradde, fæto sta che Zena a l'é sucida! E òua manco ciù i bezeugni di chen vegnan arecugeiti! Vedde Zena coscì mâ reduta me fa strenze o cheu. Sciâ fasse anche vosciâ comme i dûxi da Republica che quande gh'ea da inandiâ quarcösa pò-u ben de Zena no se son mai tiæ inderê. Ghe contemmo!

Comme gh'ò za dito l'anno pasòu, bezeugna che tutti se pigemmo l'inpegno no solo de difende a nòstra bella lengoa zeneize, ma d'atrovâ e stradde pe rilanciâla. A l'é 'n patrimonio coscì dito inmateriale ch'a gh'à quæxi mill'anni e che poemo perde de chi a trent'anni! Pe questo inportantissimo l'é l'inpegno de istituçioin. A Compagna a l'é disponibile de travagiâ co-o Comun za da òua.

E parlando de cöse de Zena no pòsso astegnime da notâ che inta bella trasmiscion in sciâ "Capella Scistinn-a" in quæxi doe oe de trasmiscion l'Alberto Angela o no l'â trovòu dexe segondi pe dî che i doî pappi ciù coinvolti, Scisto IV e Giulio II, ean de Sann-a! A mæxima cösa pe-e pontæ dedicæ a-o Loenso de Medici: s'é parlòu tanto da Scimonetta Vespucci e no s'é mai dito che o seu nome da figgia o l'ea Cattaneo e ch'a l'ea zeneize! Fòscia, sciô scindico, in pensierin de intervegnî istituçionalmente in caxi coscì sfaciæ, dove Zena a vegne ascordâ do tutto, bezurieiva falo e in pö de sciato in sce questi temi o servieiva anche pò-u turismo.

Pe vegnî a-e cöse belle, A Compagna a l'é stæta contenta de vedde che, finalmente, dòppo avei mogognòu in ben quattro confeughi (2009, 2010, 2011, 2013), a statoa do Ducca de Galliera, Raffaele De Ferrari, a l'â trovòu a seu colocaçion in fondo a-a stradda Corsega, apenn-a primma da rionda. A Compagna a l'ea presente co-o gonfalon quande a statoa a l'é stæta missa in sciô pèdestallo e a ghe tegne a ese presente quande o Comun o faiâ l'inouguaçion ofiçiale.

Comme l'anno pasòu, finiscio co-i Mogognin, mogogni fæti da zoeni de scheue superiori e recugeiti da-i nòstri sòcci Mirko e Rossana Oriati. Ecco chi a busta con tutti i Mogognin che se peuan riasumme coscì: tanti i problemi da viabilitæ, a çitâ a dev'ese ciù polita (l'ò dito mi ascì), fâ inçiative pe rende Zena ciù atraente into rispetto da tradiçion.

Mi ò finio. M'é cao concludde co-o dî che st'anno chi gh'emmo di canti nataliççi anche in ingleize: sciâ i pigge comme 'n òmaggio a-a seu atività fæta a l'estero e comme 'n ougurio de cheu pe quello che sciâ l'â da fâ chi in patria: chi a Zena.

Tanti ouguri e scignorîa a Vosciâ e a tutti. Pe Zena e pe San Zòrzo!

Franco Bampi
Presidente de A Compagna